



















古樂苑卷第三十

西吳 梅鼎祚 補正

東越 呂胤昌 校閱

琴曲歌辭

琴者先王所以脩身理性禁邪防淫者也是故君子無故不去其身唐書樂志曰琴禁也夏至之音陰氣初動禁物之淫心也世本曰琴神農所造廣雅曰伏羲造琴長七尺二寸而有五弦楊雄琴清英曰舜彈五弦之琴而天下化琴操曰琴長三尺六寸六分象三百六十日廣六寸象六合也文上曰池池水也言其平下曰濱濱賓也言其服也前廣後狹尊卑象也上圓下方法天地也五弦象五行也文王武王加二弦以合君臣之恩古今樂錄曰今稱二弦爲文武弦是也應劭風俗通曰七弦法七星也三禮圖曰琴第一弦爲宮次弦爲商次爲角次爲羽次爲徵次爲少宮次爲少商桓譚新





論曰今琴四尺五寸法四時五行也崔豹古今注  
曰蔡邕益琴爲九弦二弦大次三弦小次四弦尤  
小梁元帝纂要曰古琴名有清角黃帝之琴也鳴  
鹿循況濫脅號鍾自鳴空中皆齊桓公琴也繞梁  
楚莊王琴也綠綺司馬相如琴也焦尾蔡邕琴也  
鳳皇趙飛燕琴也自伏羲制作之後有匏巴師文  
師襄成連伯牙方子春鍾子期皆善鼓琴而其曲  
有暢有操有引有弄琴論曰和樂而作命之曰暢  
言達則兼濟天下而美暢其道也憂愁而作命之  
曰操言窮則獨善其身而不失其操也引者進德  
脩業申達之名也弄者情性和暢寬泰之名也其  
後西漢時有慶安世者爲成帝侍郎善爲雙鳳離  
鸞之曲齊人劉道疆能作單鳬寡鶴之弄趙飛燕  
亦善爲歸風送遠之操皆妙絕當時見稱後世若  
夫心意感發聲調諧應大弦寬和而溫小弦清廉  
而不亂攪之深醇之愉斯爲盡善矣古琴曲有五  
曲九引十二操五曲一曰鹿鳴二曰伐檀三曰騶  
虞四曰鵲巢五曰白駒九引一曰列女引二曰伯  
妃引三曰貞女引四曰思歸引五曰霹靂引六曰  
走馬引七曰箜篌引八曰琴引九曰楚引十二操



一曰將歸操二曰猗蘭操三曰龜山操四曰越裳  
操五曰拘幽操六曰岐山操七曰履霜操八曰朝  
飛操九曰別鶴操十曰殘形操十一曰水仙操十  
二曰襄陵操自是已後作者相繼而其義與其所  
起畧可考而知  
故不復備論

右郭氏樂府序也按樂府解題曰琴操紀事好與  
本傳相違存之者以廣異聞也風雅逸篇曰琴操  
一書載堯舜文武孔子之辭猶謬知者可一覽而  
悟也然其辭猶效古而偽撰者亦出魏晉人之手  
相傳既久始錄之今所具列仍復傳疑至如篇次  
各依世序惟本曲所繇起云其本爲琴歌而不入  
琴操者如扈子窮劫之曲處女鼓琴歌子桑琴歌  
相和歌秦琴女歌百里妻琴歌杞梁妻琴歌並附  
于內又按嵇康琴賦有云東武太山王昭楚妃注  
引魏武帝東武吟曹植太山梁甫吟石崇楚妃歎  
則此類亦皆琴曲也樂府各有分屬他如蔡邕釋  
誨中胡老援琴而歌嵇康琴賦中歌之類並設爲  
之辭本非  
琴曲不錄



唐虞至西楚

神人暢

古今樂錄曰堯郊天地祭神座上有響誨堯曰水方至為害命子救之堯乃作歌謝

希逸琴論曰神人暢堯帝所作堯彈琴感神人現故制此弄按嵇康琴賦云雅咏唐堯注引七畧雅暢第十七曰琴道曰堯暢逸又曰堯則兼善天下無不通暢故謂之暢咏與暢同也

唐堯

清廟縣兮承予宗百僚肅兮于寢堂醊禱進福求年豐

有謬在坐敕予為害在玄中欽哉皓天德不隆承命任

禹寫中宮

堂徒紅切吳才老韻引楊諫議銘太尉在漢四世以公於陵正直僕射於唐唐可叶公則

堂亦當為此叶謬古響字害

一本作害中宮一作東宮

思親操

古今樂錄曰舜遊歷山見鳥飛思親而作此歌謝希逸琴論曰舜作思親操孝之生



也

虞舜

陟彼歷山兮崔嵬有鳥翔兮高飛瞻彼鳩兮徘徊河水  
洋洋兮青泠深谷鳥鳴兮嚶嚶設罝張罝兮思我父母  
力耕日與月兮往如馳父母遠兮吾當安歸設罝張罝一作設罝

張罝當一作將

南風歌

二首後首琴操作南風操孔子家語曰舜彈五弦之琴歌南風之詩史記樂書曰舜歌南風而天下治南風者生長之音也舜樂好之樂與天地同意得萬國之驩心故天下治也

玉海逸詩

虞舜

南風之薰兮可以解吾民之愠兮南風之時兮可以阜

吾民之財兮

愠叶平聲財叶前西反



南風操

反彼三山兮商嶽嵯峨天降五老兮迎我來歌有黃龍  
兮自出于河負書圖兮委虵羅沙案圖觀識兮閔天嗟  
嗟擊石拊韶兮淪幽洞微鳥獸蹢蹢兮鳳皇來儀凱風  
自南兮喟其增悲

襄陵操

一曰禹上會稽書曰湯湯洪水方割蕩蕩  
懷山襄陵浩浩滔天古今樂錄曰禹治洪

水上會稽山顧而作此歌謝希逸琴論曰夏禹  
治水而作襄陵操琴集曰禹上會稽夏禹東巡

狩所  
作也

夏禹

嗚呼洪水滔天下民愁悲上帝愈咨三過吾門不入父  
子道哀嗟嗟不欲煩下民

古音  
黎



箕子操

一曰箕子吟史記曰紂始爲象箸箕子歎曰彼爲象箸必爲玉杯爲玉杯則必思遠方珍怪之物而御之矣與馬宮室之漸自此始不可振也紂爲淫泆箕子諫不聽人或曰可以去矣箕子曰爲人臣諫不聽而去是彰君之惡而自說于民吾不忍爲也乃披髮佯狂而爲奴遂隱而鼓琴以自悲故傳之曰箕子操古今樂錄曰紂時箕子佯狂痛宗廟之爲墟乃作此歌後傳以爲操琴集曰箕子吟箕子自作也按其辭紂爲無道殺比干紂乃商辛之謚史記云天下謂之紂亦自其後言之耳且漆身負石皆近申屠豫讓事疑或後人傳會也

殷箕子

嗟嗟紂爲無道殺比干嗟重復嗟獨奈何漆身爲厲被髮以佯狂今奈宗廟何天乎天哉欲負石自投河嗟復嗟奈社稷何



# 傷殷操

琴集曰傷殷操微子所作也尚書大傳曰微子將朝周過殷之故墟見麥秀之蘄蘄

黍禾之蠅蠅也曰此故父母之國宗廟社稷之  
亾也志動心悲欲哭則為朝周欲泣則近婦人  
推而廣之作雅聲即此操也亦謂之麥秀歌史  
記箕子世家曰箕子朝周過故殷墟感宮室毀  
壞生禾黍乃作麥秀之詩以歌詠之彼所謂狡  
童者紂也學齋佔畢曰史記與尚書大傳所載  
之歌只差末句一字惟書序與歌蘄蘄蠅蠅字  
不同宋玉笛賦枚乘七發皆麥秀蘄今注麥芒  
也但史記以為箕子而書傳以為微子且稱父  
母之國尤為有理不知司馬何所據而與抵牾  
耶按嵇康琴賦云終詠微子注引七畧微子傷  
殷之將亡終不可奈何見鴻鵠高飛援琴作操  
則又自有  
微子操矣

## 殷微子

麥秀漸漸兮禾黍油油彼狡童兮不我好仇

尚書大傳

麥秀漸漸兮禾黍油油彼狡童兮不與我好兮

史記油古音



又好叫  
許候反

# 採薇操

琴集曰採薇操伯夷所作也史記曰武王克殷伯夷叔齊耻之不食周粟隱於首陽

山採薇而食之及餓且死乃作歌因傳以為操樂府解題曰採薇操亦曰晨遊高舉按史記歌

辭與琴

集小異

## 殷伯夷

登彼高山言採其薇以亂易暴不知其非神農虞夏忽

焉沒兮我適安歸

琴集

登彼西山兮采其薇矣以暴易暴兮不知其非矣神農  
虞夏忽焉沒兮我安適歸矣于嗟徂兮命之哀矣

史記

# 岐山操

琴苑要錄曰岐山操者周太王之所作也太王居邠狄人攻之事之以珠玉犬馬皮

幣狄侵不止問其所欲得土地也太王曰土地所以養萬民也吾不爭所用養而害吾所養遂



策杖而去之踰梁山而邑乎周太王

岐山喟然歎息援琴而鼓之

狄戎侵兮土地遷移邦邑適於岐山烝民不憂兮誰者

知嗟嗟奈何兮予命遭斯

拘幽操

一曰文王哀姜里琴操曰拘幽操文王拘於姜里而作也文王脩德百姓親附崇侯

虎嫉之譖於紂曰西伯昌聖人也長子發中子旦皆聖人也三聖合謀君其慮之乃囚文王於姜里將殺之於是文王四臣太顛閎夭散宜生南宮适之徒得美女大貝白馬朱鼠以獻於紂紂遂出西伯文王在姜里乃申憤而作歌云兩山墨錄曰此操見通鑑外紀詳其辭意恕誹淺

激非文

王語也

周文王

殷道溷溷浸濁煩兮朱紫相合不別分兮迷亂聲色信  
讒言兮炎炎之虐使我愆兮幽閉牢穽由其言兮遘我



四人憂勤勤兮

頌叶分沿反分叶膚眠反勤叶音虔炎  
災之虐使我愆兮樂錄作閭闔之虎使

我寮兮虎蓋  
謂崇侯虎也

文王操

琴操曰紂為無道諸侯皆歸文王其後有  
鳳皇銜書於郊文王乃作此歌謝希逸琴

論曰文王操文王作也  
玉海作文王鳳凰歌

周文王

翼翼翱翔彼鳳皇兮銜書來遊以會昌兮瞻天案圖殷

將亾兮蒼蒼之天始有萌兮五神連精合謀房兮興我

之業望來羊兮

翱翔一作翔翔鳳一作鸞會一作命之  
一作吳五神連精合謀房兮一作精連

神合謀  
於房兮

尅商操

一曰武王伐紂古今樂錄曰武王伐紂而  
作此歌謝希逸琴論曰尅商操武王伐紂

時制琴集曰武王  
伐紂武王自作也

周武王



上告皇天今可以行乎

行叶音先

越裳操

琴操曰越裳操周公所作也周公輔成王成文王之王道越裳重九譯而來獻白雉

周公乃援琴而歌之遂受之獻于文王之廟裳一作嘗

周公旦

於戲嗟嗟非旦之力乃文王之德

力下德下一各有也字

神鳳操

一曰鳳皇來儀古今樂錄曰周成王時鳳皇翔舞成王作此歌謝希逸琴論曰成王作神鳳操言德化之感也琴集曰鳳皇來儀成王所作玉海作周成王儀鳳歌

周成王

鳳皇翔今於紫庭予何德今以感靈賴先人今恩澤臻

于胥樂今民以寧

於玉海作舞宋書符瑞志初學記並載此臻一作臻

履霜操

琴操曰履霜操尹吉甫之子伯奇所作也伯奇無罪為後母讒而見逐乃集芟荷以



為衣採棉花以為食晨朝履霜自傷見放  
於是援琴鼓之而作此操曲終投河而死

### 周尹伯奇

履朝霜兮採晨寒考不明其心兮聽讒言孤息別離兮  
摧肺肝何辜皇天兮遭斯愆痛歿不同兮恩有偏誰能

流顧兮知我冤

寒叶胡干反  
肝叶經天反

### 獻王退怨歌

琴操曰卞和者楚野民得玉璞以獻  
懷王王使樂正子占之言玉石以為

欺謾斬其一足懷王死子平王立和復獻之又  
以為欺斬其一足平王死子立為荆王欲獻之  
恐復見害乃抱玉而哭涕盡繼之以血荆王使  
剖之中果有玉乃封和為陵陽侯辭不受而作  
退怨之歌風雅逸篇曰此歌出琴操其叙述和  
事與正史亦異果和所作耶今按平王遠在懷  
王前而懷王之子乃頃襄王韓非子曰楚人和  
氏得璞玉于楚山之中奉而獻之武王武王使



玉人相之玉人曰石也別和氏左足武王薨成  
王卽位和又獻之玉人又曰石也別其右足成  
王薨文王卽位和乃抱璞而哭於楚山之下王  
使玉人理其璞而得寶焉遂名曰和氏之璧當  
以韓子爲正今按史  
記成王在文王後

楚卞和

悠悠沂水經荆山精氣鬱滄谷岩岩中有神寶灼明明

穴山采玉難爲功於何獻之楚先王遇王暗昧信讒言

斷截兩足離余身俛仰嗟歎心摧傷紫之亂朱紛墨同

空山歛歛涕龍鍾天鑒孔明竟以彰沂水滂沛流于汶

進寶得朋足離分斷者不續豈不怨

山叶輸旃反明叶謨郎反功叶音光

言叶魚斤反同叶徒黃反鍾叶諸良反汶叶微勾反分叶方情反怨叶紆云反

琴歌

三首風俗通曰百里奚爲秦相堂上樂作所賁澣婦自言知音因援琴撫弦而歌問之乃



其故妻還爲夫婦也亦謂之屢屢歌  
字說曰門關謂之屢屢或作剡移

秦百里奚妻

百里奚五羊皮。憶別時烹伏雌。炊屢屨。今日富貴忘我爲。

百里奚初娶我時五羊皮。臨當別時烹乳雞。今適當富貴。忘我爲。

百里奚百里奚母已死。葬南谿墳。以瓦覆。以柴春黃藜。益伏雞。西入秦。五羖皮。今日富貴捐我爲。

百里奚歌

梁高允生

羈旅入秦庭。始得收顯曜。釋褐出輜車。卓爲千乘道。豔



色進華容繁弦發徵調居賢易素心翻然忘久要裝金  
五羊皮寫情陳所告豈徒望自傷念君無定操

### 士失志操

琴集曰士失志操介子推所作也一曰龍蛇歌琴操曰文公與介子綏俱遁子

綏割腓股以啖文公文公復國咎犯趙衰俱蒙厚賞子綏獨無所得乃作龍蛇之歌而隱文公求之不肯出史記曰文公重耳奔狄其後反國賞從亡未及介子推子推欲隱從者憐之乃懸書宮門文公出見之曰此介子推也使入召之亡入縣上山中於是文公環縣上山而封之以爲介推田號曰介山是也左傳曰晉侯賞從亡者介之推不言祿祿亦弗及其母曰盍亦求之以死誰對對曰尤而效之罪又甚焉且出怨言不食其食其母曰亦使知之若何對曰言身之文也身將隱焉用文之是求顯也其母曰能如是乎與女階隱遂隱而歿呂氏春秋劉向新序皆以爲子推自作辭並小異說范又作舟之僑歌事類子推而辭復同新序今別載古歌中



晉介子推

有龍矯矯遭天譴怒三虵從之一虵割股二虵入國厚

蒙爵土餘有一虵棄於草莽

怒上聲莽叶

有龍于飛周徧天下五虵從之爲之承輔龍反其鄉得

其處所四虵從之得其露雨一虵羞之橋歿於中野

呂氏

春秋野叶上與反

龍欲上天五虵爲輔龍已升雲四虵各入其宇一虵獨

怨終不見處所

史記

索隱曰五虵卽五臣狐偃趙衰魏武子司空季子及子推也舊云五臣

有先軫顛頤恐非其類

有龍矯矯將失其所有虵從之周流天下龍旣入深淵



得其安所虵脂盡乾獨不得甘雨

新序

有龍矯矯頃失其所五虵從之周徧天下龍饑無食一

虵割股龍反其淵安其壤土四虵入穴皆有處所一虵

無災號於中野

說苑 下 叶後五反

伯姬引

琴苑要錄曰伯姬引者保母之所作也伯姬魯女也為宋共公夫人公薨伯姬執節

守貞魯襄公三十年宋宮災伯姬在焉有司請曰火將至矣伯姬曰吾聞婦人夜出不見傳母

不下堂逮乎火而死其母自傷行遲悼伯姬之遇災援琴而歌

嘉名潔兮行彌彰托節鼓兮令躬喪歎欽何辜遇斯殃

嗟嗟柰何惟斯殃

琴歌

列女傳曰齊人杞梁殖襲莒戰死其妻哭於城下七日而城崩故琴操云殖死其妻援琴



作歌

齊杞梁妻

樂莫樂兮新相知悲莫悲兮生別離

見水經註

琴操杞梁死妻援琴歌曰

樂莫樂兮新相知悲莫悲兮生別離哀感皇天城為隳

見太平御覽

杞梁妻

崔豹古今注曰杞梁妻者杞殖妻妹朝日之所作也殖戰死妻曰上則無父中

則無夫天下則無子人生之苦至矣乃抗聲長哭杞都城感之而頽遂投水而死其妹悲姊之貞乃作歌名曰杞梁妻焉梁殖之字也列女傳曰齊莊公襲莒殖戰而死其妻無所歸乃就其夫之尸於城下而哭十日而城為之崩既葬遂赴淄水而死琴操曰杞梁妻歎齊杞梁殖其妻之所作也

宋吳邁遠



燈竭從初明蘭凋猶早薰扼腕非一代千載炳遺文貞  
夫淪莒役杜弔結齊君驚心眩白日長洲崩秋雲精微  
貫穹昊高城爲隕墳行人既迷徑飛鳥亦失羣壯哉金  
石軀出門形影分一隨塵壤消聲譽誰共論

吳一作旻

龜山操

琴操曰季桓子受齊女樂孔子欲諫不得退而望魯龜山作此曲以喻季氏若龜山之蔽

之蔽魯也

魯孔子

予欲望魯兮龜山蔽之手無斧柯奈龜山何

柯叶於離返何叶寒

反

暇操

一曰繫操史記世家曰孔子既不得用於衛將西見趙簡子至於河而聞竇鳴犢舜華之

死臨河而歎曰美哉水洋洋乎丘之不濟此命也夫子貢曰何謂也孔子曰竇鳴犢舜華晉國

所以七日誅少正卯也故知聖人不尚姑息



之賢大夫也趙簡子未得志之時須此兩人而  
后從政及其已得志殺之乃從政丘聞之也刳  
胎殺夭則麒麟不至郊竭澤涸漁則蛟龍不合  
陰陽覆巢毀卵則鳳皇不翔何則君子諱傷其  
類也夫鳥獸之於不義也尚知辟之而況乎丘  
哉乃還息乎陬鄉作為陬操以哀之孔叢子曰  
趙簡子使聘夫子將至焉及河聞鳴犢竇犢之  
見殺也迴輿而旋之衛息陬為操孔子家語曰  
還息於陬作繫操以哀之注即此歌王肅曰陬  
操琴曲也水經注又有臨河歌事同辭異本  
非琴操今亦附後

魯孔子

周道衰微禮樂陵遲文武既墜吾將焉歸周遊天下靡  
邦可依鳳鳥不識珍寶梟鴟眷然顧之慘然心悲巾車  
命駕將適唐都黃河洋洋攸攸之魚臨津不濟還轅息  
鄆傷予道窮哀彼無辜翱翔于衛復我舊廬從吾所好



其樂只且

文武既墜吾將焉歸一作文武既醉我將焉歸晉一作唐朱熹云孔叢子紀孔子事多

失實非東漢人之書

將歸操

琴操曰孔子將西見趙簡子至河而返作將歸操

翱翔于衛復我舊居從吾所好其樂只且

槃操

一名息阪操

乾澤而漁蛟龍不遊覆巢毀卵鳳不翔留慘予心悲還

原息阪

臨河歌

酈道元水經注曰孔子適趙臨河不濟歎而作歌

秋水衍兮風揚波舟楫顛倒更相加歸來歸來胡為

斯

秋水名在臨濟舊作秋誤



猗蘭操

一曰幽蘭操古今樂錄曰孔子自衛反魯見香蘭而作此歌琴操曰猗蘭操孔子所

作孔子歷聘諸侯諸侯莫能任自衛反魯隱谷之中見薝蘭獨茂喟然歎曰蘭當為王者香今乃獨茂與眾草為伍乃止車援琴鼓之自傷不逢時託辭於蘭云琴集曰幽蘭操孔子所作也按此雖云託辭于蘭義實無與

習習谷風以陰以雨之子于歸遠送于野何彼蒼天不

得其所逍遙九州無所定處時人闇蔽不知賢者年紀

逝邁一身將老

時一作世老叶滿補反

同前

隋辛德源

奏事傳青閣拂除乃陶嘉散條凝露彩含芳映日華已  
知香若麝無怨直如麻不學芙蓉草空作眼中花



幽蘭

五首宋玉諷賦曰獨有主人女在止臣其中中有鳴琴焉臣援而鼓之爲幽蘭白雪

之曲

宋鮑照

傾暉引暮色孤景流思顏梅歇春欲罷期渡往不還  
簾委蘭蕙露帳含桃李風攬帶昔何道坐令芳節終  
結佩徒分明抱梁輒乖忤華落知不終空愁坐相悞  
眇眇蛸挂網漠漠蠶弄絲空慙不自信怯與君畫期  
陳國鄭東門古今共所知長袖暫徘徊駟馬停路岐

歸耕操

琴操曰曾子事孔子十有餘年晨覺卷然年衰養之不備也于是援琴而歌曰

曾參

竭來歸耕歷山盤今以晏父母我心博兮

琴操



戲歛歸耕來兮安所歸耕歷山盤兮

琴清英

窮劫之曲

吳越春秋曰樂師扈子非荆王信讒佞殺伍奢白州犁至乃掘平王墓而寇不

絕於境戮屍以辱楚君臣又傷昭王困迫幾爲天下大鄙乃援琴爲楚作窮劫之曲昭王垂涕深知琴曲之情扈子遂不復鼓矣

楚扈子

王耶王耶何乖烈不顧宗廟聽讒孽任用無忌多所殺  
誅夷白氏族幾滅二子東奔適吳越吳王哀痛助怵怛  
垂涕舉兵將西伐伍胥白喜孫武決三戰破郢王奔發  
留兵縱騎虜京闕楚荆骸骨遭掘發鞭辱腐屍耻難雪  
幾危宗廟社稷滅莊王何罪國幾絕卿士悽愴民惻候  
吳軍雖去怖不歇願王更隱撫忠節勿爲讒口能謗褻



無忌費無忌也二子伍  
正月曰喜也 烈疑作劣

別鶴操

崔豹古今注曰別鶴操商陵牧子所作也  
娶妻五年而無子父兄將為之改娶妻聞

之中夜起倚戶而悲嘯牧子聞之愴然而悲乃  
援琴而歌後人因為樂章焉琴譜曰琴曲有四  
大曲別鶴操其一也按太平御覽載琴操曰牧  
子援琴鼓之云痛恩愛之永離歎別鶴以舒情  
故曰別操與此辭異稿  
康琴賦曰千里別鶴

商陵牧子

將乖比翼兮隔天端山川悠遠兮路漫漫攬衣不寐兮

食忘餐

古今注無三兮字攬衣一作搯衾食一作辰  
別鶴操至龍丘引並無考世代舊編錯互

同前

宋鮑照

雙鶴俱起時徘徊滄海間長弄若天漢輕軀似雲懸幽  
客時結侶提攜遊三山青繳凌瑤臺丹爐籠紫煙海上



悲風急三山多雲霧散亂一相失驚孤不得住緬然日  
月馳遠矣絕音儀有願而不遂無怨以生離鹿鳴在深  
草蟬鳴隱高枝心自有所懷旁人那得知悲一作疾遊一作到遠一作存

別鶴

一作鳥棲曲

梁簡文帝

接翮同發燕孤飛獨向楚值雪已迷羣驚風復失侶

同前

吳均

別鶴尋故侶聯翮遼海間單棲孟津水驚唳隴頭山

水仙操

琴苑要錄曰水仙操伯牙之所作也伯牙學琴於成連三年而成至於精神寂寞情

之專一未能得也成連曰吾之學不能移人之情吾師有方子春在東海中乃賁糧從之至蓬



萊山。留伯牙曰：吾將迎吾師，刺船而去。旬時不返。伯牙心悲，延頸四望，但聞海水汨汨，山林昏冥。羣鳥悲號，仰天歎曰：先生將移，我情乃援琴而作此歌。

伯牙

緊洞渭兮流漸，渡舟楫逝兮仙不還。移形素兮蓬萊山，歎欽傷宮仙石還。

一序已盡琴理，歌詞畧見大意。

貞女引

一曰：處女吟琴苑要錄曰：貞女引者，魯次室女之所作也。次室女倚柱悲吟而嘯鄰

人謂曰：欲嫁耶？何吟之悲也？次室女曰：嗟乎！吾傷民心悲而嘯，豈欲嫁哉？自傷懷潔而為鄰人所疑，於是褰裳而去之。入山林之中，見貞女之廟，喟然歎息，援琴而歌。自縊而死，繫骸骨於林。今附神靈於貞女，故曰貞女引。古今樂錄曰：魯處女見女貞木而作歌，亦謂之女貞木歌。琴操曰：處女吟，魯處女所作也。

魯處女

菁菁茂木，隱獨榮兮。變化垂枝，含蕤英兮。脩身養志，建



令名今厥道不同善惡并今屈身身獨去微清兮懷忠

見疑何貪生兮

同一作積屈身身獨去微清  
一作屈躬就濁世疑清兮

同前

梁簡文帝

借問懷春臺百尺凌雲霧北有歲寒松南臨女貞樹庭  
花對帷滿隙月依枝度但使明妾心無嗟坐遲暮

同前

沈約

貞心信無矯傍隣也見疑輕生本非惜賤軀良足悲傳  
芳託嘉樹弦歌寄好辭

思歸引

一曰離拘操琴操曰衛有賢女邵王聞其  
賢而請聘之未至而王薨太子曰吾聞齊

桓公得衛姬而霸今衛女賢欲畱大夫曰不可  
若女賢必不我聽若聽必不賢不可取也太子

樂花

卷三十

十五



遂留之果不聽拘於深宮思歸不得遂援琴而  
作歌曲終縊而死晉石崇有思歸引以古曲有  
弦無歌乃作樂辭但思歸河陽別業與琴操異  
也樂府解題曰若梁劉孝威胡地憑良馬備言  
思歸之狀而已按謝希逸琴論曰箕  
子作離拘操不言衛女作未知孰是

### 衛女

涓涓泉水流及于淇兮有懷于衛靡日不思執節不移  
今行不隳矜軻何辜兮離厥菑嗟乎何辜兮離厥菑

琴苑

西宴錄

涓涓淇水流于淇兮有懷于衛靡日不思執節不移兮  
行不詭隨坎坷何辜兮離厥茨

風雅逸篇

同前

晉石崇



序曰余少有大志夸邁流俗弱冠登朝歷位二十五年五十以事去官晚節更樂放逸篤好林藪遂肥遁于河陽別業其制宅也却阻長堤前臨清渠百木幾于萬株江水周于舍下有觀閣池沼多養魚鳥家素習技頗有秦趙之聲出則以遊目弋釣爲事入則有琴書之娛又好服食咽氣志在不朽傲然有凌雲之操歛復見牽羈婆娑于九列困於人間煩黷常思歸而永歎尋覽樂篇有思歸引儻古人之心有同于今故制此曲此曲有弦無歌今爲作歌辭以述余懷恨時無知音者今造新聲而播于絲竹也

思歸引  
歸河陽  
假余翼  
鴻鶴高飛  
翔經芒阜  
濟河梁  
望我舊館  
心悅康清  
渠激魚彷徨  
鴈驚沂波  
羣相將終日  
周覽樂無方  
登雲閣列姬姜  
拊絲竹叩宮商  
宴華池酌玉觴



同前

梁劉孝威

胡地憑良馬懷驕負漢恩甘泉烽火入回中宮室燔錦  
車勞遠駕繡衣疲屢奔貳師已喪律都尉亦銷魂龍堆  
求援急狐塞請先屯櫪下驅雙駿腰邊帶兩鞬乘障無  
期限思歸安可論

一作言

思歸歎

本非琴操類附于此

晉石崇

登城隅兮臨長江極望無涯兮思填胸魚澆爵兮鳥  
續翻澤雉遊鳬兮戲中園秋風厲兮鴻鴈征蟋蟀嘈  
嘈兮晨夜鳴落葉飄兮枯枝竦百草零落兮覆畦壠  
時光逝兮年易盡感彼歲暮兮悵自愍廓羈旅兮滯



野都願御北風兮忽歸徂惟金石兮幽且清林鬱茂  
兮芳卉盈玄泉流兮縈丘阜閣館蕭寥兮蔭叢柳吹  
長笛兮彈五弦高歌凌雲兮樂餘年舒篇卷兮與聖  
談釋冕投綬兮希彭聃超逍遙兮絕塵埃福亦不至  
今禍亦不來

并一作草五  
弦一作玉琴

霹靂引

謝希逸琴論曰夏禹作霹靂引樂府解題  
曰楚商梁遊於雷澤霹靂下乃援琴而作

之名霹靂引琴苑要錄曰霹靂引楚商梁之所  
作也商梁出遊九臯之澤覽漸水之臺引琴而  
周於荆田臨曲池而漁疾風震電雷奄冥大  
水四起霹靂下臻矍然而驚其僕曰孤虛設張  
八宿相望熒惑于角五星失行此國之大變也  
君其返國矣於是商梁返室援琴歎之韻聲激  
發象霹靂之聲故曰霹靂引楚商梁者或云楚  
莊王也聲之誤耳按前二說互異據歌辭有仁



國喪年之說

與商梁合

楚商梁

疾雨盈河霹靂下臻洪水浩浩滔厥天鑑起隆愧隱隱

闐闐國將亡今喪厥年

天叶鐵因反  
年叶知林反

同前

梁簡文帝

來從東海上發自南山陽時聞連鼓響乍散投壺光飛  
車走四瑞繞電發時祥令去於斯表殺來永傳芳

同前

隋辛德源

出地聲初奮乘乾威更作雲銜天笑明雨帶星精落碎  
枕神無繞震楹書自若側聞吟白虎遠見飛玄鶴

側一作時

飛一作舞



走馬引

一曰天馬引崔豹古今注曰走馬引樗里牧恭所作也爲父報怨殺人而亡匿於山之下有天馬夜降圍其室而鳴覺聞其聲以爲追吏奔而亡去明旦視之乃天馬跡也因惕然大悟曰豈吾所處之將危乎遂荷糧而逃入于沂澤中援琴而鼓之爲天馬之聲故曰走馬引也

梁張率

良馬龍爲友玉珂金作羈馳驚宛與洛半驟復半馳倏忽而千里光景不及移九方惜未見薛公寧所知歛轡且歸去吾畏路傍兒

馳驚一作相去

天馬引

陳傳緯

驄色表連錢出翼復來燕取用偏開地爲歌乃號天權奇意欲遠蹀躞勢難前本珍白玉鐙因飾黃金鞭願酬



芻秣寵千里得千年

龍丘引

一曰楚引琴操曰楚引者楚遊子龍丘高所作也龍丘高出遊三年思歸故鄉望楚

而長歎故曰楚引

梁簡文帝

龍丘一迴首楚路蒼無極水照弄珠影雲吐陽臺色浦  
狹村煙度洲長歸鳥息遊蕩逐春心空憐無羽翼

浦狹村煙度

陳張正見

茅蘭夾兩岸野燎燭中川村長合夜影水狹度浮煙收  
光暗鳥弋分火照漁船山人不炊桂樵華幸共然

雉朝飛操

一曰雉朝雉操楊雄琴清英曰雉朝飛操衛女傅母之所作也衛侯女嫁於齊

太子中道聞太子死問傅母曰何如傅母曰且往當喪喪畢不肯歸終之以死傅母悔之取女



所自操琴於冢上鼓之忽二雉俱出墓中傅母撫雉曰女果爲雉耶言未畢俱飛而起忽然不見傳母悲痛援琴作操故曰雉朝飛崔豹古今注曰雉朝飛者犢沐子所作也齊宣王時處士泯宣年五十無妻出薪於野見雉雄雌相隨而飛意動心悲乃仰天歎大聖在上恩及草木鳥獸而我獨不獲因援琴而歌以明自傷其聲中絕魏武帝時宮人有盧女者七歲入漢宮學鼓琴特異於餘妓善爲新聲能傳此曲郭本又載伯牙琴歌于注今作正書

### 齊犢沐子

雉朝飛兮鳴相和雌雄羣遊於山阿我獨何命兮未有  
家時將暮兮可奈何嗟嗟暮兮可奈何

叶家

### 同前

### 宋鮑照

雉朝飛振羽翼專場挾雌恃彊力媒已驚翳又逼蒿閒



潛發盧矢直列繡頸碎錦臆絕命君前無怨色握君手  
執杯酒意氣相傾死何有

雌一作兩

同前

梁簡文帝

晨光照麥畿平野度春暈避鷹時聳角妬壠或斜飛少  
年從遠役有恨意多違不如隨蕩子羅袂拂臣衣

或一作忽

同前

吳均

二月雉朝飛橫行傍龍歸斜看水外翟側聽嶺南暈蹀  
躞恒欲戰耿耿恃彊威當令君見賞何辭碎錦衣

琴歌

此亦非必爲此操以有雉朝飛之語郭本附注

伯牙

麥秀蘄兮雉朝飛向虛壑兮背喬槐依絕區兮臨曲池



鼓琴歌

一曰鼓瑟歌史記曰趙武靈王夢見處女鼓琴而歌異曰王飲酒樂數言所夢想見

其狀吳廣聞之因夫人而內其女娃嬴孟姚也孟姚甚有寵於王是為惠后

美人熒熒兮顏若君之榮命乎命乎曾無我嬴

秦母遂曰言有

命祿生遇其時人莫知已貴盛盈端也

子桑琴歌

莊子曰子輿與子桑友而霖雨十日子輿曰子桑殆病矣裹飯而往食之至子

桑之門則若歌若哭鼓琴云云子輿入曰子之歌聲何故若是曰吾思夫使我至此極者而不得也父母豈欲吾貧哉天地豈私貧我哉然而至此極者命也

子桑

父邪母邪天乎人乎

相和歌

莊子曰子桑戶孟子反子琴張三人相與友子桑戶死未葬孔子使子貢往待事焉

或編曲或鼓琴相和而歌



嗟來桑戶乎嗟來桑戶乎而已反其真而我猶為人猗

渡易水

一曰荆軻歌史記曰燕太子丹質於秦忽而亡歸使荆軻刺秦王太子及賓客皆白

衣冠以送之至於易水之上既祖取道高漸離擊筑軻和而歌為變徵之聲又前而為此歌復為羽聲慷慨士皆瞋目髮盡上指冠於是就車而去樂府廣題曰後人以為琴中曲按琴操商

調有易水曲荆軻所作亦曰渡易水是也

燕荆軻

風蕭蕭兮易水寒壯士一去兮不復還

叶至今讀之猶存變徵之聲

同前

一作荆軻歌

梁吳均

襍虜客來齊時余在角抵揚鞭渡易水直至龍城西日昏笳亂動天曙馬爭嘶不能通瀚海無面見三齊

荆軻歌

陳陽縉



函谷路不通燕將重深功長虹貫白日易水急寒風壯  
髮危冠下七首地圖中琴聲不可識遺恨沒秦宮

### 琴女歌

燕丹子曰荆軻刺秦王右手執匕首左手  
搃其袖秦王曰今日之事從子計矣乞聽

琴聲而死琴女鼓琴琴聲云云王於是奮袖超  
屏風走之軻不解琴故及於難史記荆軻左手  
把王之袖而右手持匕首搃之未至身秦王驚  
自引而起袖絕拔劍劍長操其室時惶急劍堅  
故不可立拔左右乃曰王負劍  
負劍遂拔以擊荆軻無琴女事

### 秦琴女

羅縠單衣可裂而絕三尺屏風可超而越鹿盧之劍可

負而拔

裂一作掣

三秦記曰荆軻入秦爲燕太子報讐把秦王衣  
袂曰寧爲秦地鬼不爲燕地囚王美人彈琴作



語曰云云王因掣衣而走得免與前載小異

三尺羅衣何不掣四面屏風何不越

琴引

琴苑要錄曰琴引者秦時倡屠門高之所作也秦為無道奢淫不制徵天下美女以克後

宮乃縱酒離宮作戲倡優宮女侍者千餘人屠門高見宮女幼妙寵麗於是援琴而歌之作爲離之操曲未及終琴折柱摧絃音不鳴舍琴而更援他琴以續之

秦屠門高

酒坐俱母往聽吾琴之所言舒長衷似舞兮乃褕袂何曼奏章而却逢兮願瞻心之所驩借連娟之寒態兮假卮酒酌五般泣喻而妖兮納其聲聲麗顏歌長榆兮歎曰騎美人旖旎紛嬀柅霜羅衣兮羽旄夜袞圭玉珠參



差妙麗今被雲鬢登高臺今望青埃常羊啖還何厭兮

歸來

字多訛異

偕隱歌

琴清英曰祝牧與妻偕隱作琴歌云不詳何代附此

天下有道我黻子佩天下無道我負子戴

太平御覽引莊子載祝牧

謂其妻曰云云不言琴歌

力拔山操

史記曰項王軍壁垓下軍少食盡漢軍及諸侯兵圍之數重夜聞漢軍四面皆

楚歌項王乃大驚曰漢皆已得楚乎是何楚人之多也項王則夜起飲帳中有美人名虞常幸從駿馬名騅常騎之廼悲歌忼慨自為詩歌數闕美人和之項王泣數行下於是乃上馬直夜潰圍南出馳走平明漢軍廼覺之琴集曰力拔山操項羽所作也近世又有虞美人曲亦出於此

西楚項籍



力拔山兮氣蓋世。時不利兮騅不逝。騅不逝兮可奈何。  
虞兮虞兮奈若何。

可奈何奈若何嗚咽纏綿從古真英雄必非無情者

項王歌

無名氏

無復拔山力。誰論蓋世才。欲知漢騎滿。但聽楚歌哀。悲  
看騅馬去。泣望艤舟來。

答項王楚歌

困學紀聞曰太史公述楚漢春秋其不載於書者正義云項羽歌美

人和之是時已爲五言矣五言始於五子之歌行露

虞美人

漢兵已畧地。四面楚歌聲。大王意氣盡。賤妾何聊生。

作方

古樂苑卷第三十

終



古樂苑卷第三十一

西吳 梅鼎祚 補正

東越 呂胤昌 校閱

琴曲歌辭 漢至隋

大風起

史記曰十二年十月高祖還歸過沛留置酒沛宮悉召故人父老子弟縱酒發沛中

兒得百二十人教之歌酒酣高祖擊筑自爲歌詩令兒皆和習之高祖乃起舞慨傷懷泣數行下樂書云高祖過沛詩三侯之章令小兒歌之高祖崩令沛得以四時歌舞宗廟索隱云過沛詩卽大風歌侯語辭詩曰侯其禕而今亦語辭詩有三兮故云三侯也漢書禮樂志曰至孝惠時以沛宮爲原廟令歌兒習吹以相和常以百二十人爲員琴操曰大風起漢高帝所作也

漢高帝



大風起兮雲飛揚威加海內兮歸故鄉安得猛士兮守

四方

上言掃除羣雄不言守成也。時帝春秋高韓彭已誅而孝惠仁弱人心未定思猛士其有悔心乎

採芝操

琴集曰四皓所作也古今樂錄曰商山四皓隱居高祖聘之四皓不出仰天歎而作

歌高士傳曰四皓皆修道潔已非義不動秦始皇時見秦政虐乃退入藍田山而作歌因共入商雒隱地肺山以待天下定及秦敗漢高聞而徵之不至深自匿終南山不能屈已漢書曰四皓皆八十餘鬚眉皓白故謂之四皓即東園公角里先生綺里季夏黃公也崔鴻曰四皓為秦博士遭世暗昧坑黜儒術於是退而作此歌亦謂之四皓歌二說不同

四皓

皓天嗟嗟深谷逶迤樹木莫莫高山崔嵬巖居穴處以  
為幄茵曄曄紫芝可以療飢唐虞往矣吾當安歸



四皓歌

一曰紫芝歌  
高士傳所載

莫莫高山深谷逶迤曄曄紫芝可以療飢唐虞世遠吾  
將何歸駟馬高蓋其憂甚大富貴之畏人不如貧賤之

肆志

高山一作商洛逶迤一作威夷唐虞世遠吾將何  
歸一作皇農邈邈達余將安歸之並作而肆志一作

世輕

八公操

一云淮南操古今樂錄曰淮南好道正月  
上辛八公來降王作此歌謝希逸琴論曰

八公操淮南王作也神仙傳曰淮南王好道書  
及方術之士有入公詣門鬚眉皓白王使關人  
自以其老難問之入公皆變為童子年可十四  
五角髻青絲色如桃花王聞跣而迎登思仙之  
臺執弟子禮入童子乃復為老人告王曰吾一  
人能望致風雨立起雲霧畫地為江河撮土為  
山嶽一人能崩高山塞深泉收虎豹召致蛟龍  
使役鬼神一人能分形易貌坐存立隱蔽六軍



白日爲暝一人能乘雲步虛越海凌波出入無  
間呼吸千里一人能入火不灼入水不濡刀射  
不中冬凍不寒夏曝不汗一人能于變萬化恣  
意所爲禽獸草木萬物立成移山駐流行宮易  
室一人能煎泥成金凝鉛爲銀駕龍浮於太清  
之上安乃日夕朝拜各試所言種種異術無有  
不效遂授王丹經三十六卷藥成未及服而郎  
中雷被與伍被共誣稱安謀反天子使宗正持  
節治之入公謂安曰可以去矣此乃是天之發  
遣王王若無此事日復一日未能去世也入公  
使安登山大祭埋金於地卽白日昇天時人傳  
入公安臨去時餘藥置在中庭雞犬舐之盡得  
昇天故雞鳴天上犬吠雲中也高誘叙云蘇飛  
李尚左吳田由雷被毛被伍被晉昌八人容齋  
續筆云唯左吳雷被伍被見於史雷被蓋爲安  
所斥而亡之長安上書者疑不得爲賓客之賢  
也

淮南王安

煌煌上天照下土今知我好道公來下今公將與余生



毛羽兮超騰青雲蹈梁甫兮觀見瑤光過北斗兮馳乘  
風雲使玉女兮含精吐氣嚼芝草兮悠悠將將天相保  
兮

琴歌

古今樂錄曰霍將軍去病征匈奴有功益封萬五千戶秩祿與大將軍等於是志得意歡

而作歌琴操有霍將軍渡河操去病所作也

霍去病

四夷既護諸夏康兮國家安寧樂無央兮載戢干戈弓  
矢藏兮麒麟來臻鳳皇翔兮與天相保永無疆兮親親

百年各延長兮

護一作獲無一作未

琴歌

史記曰司馬相如與臨邛令王吉相善性舍都亭臨邛中富人卓王孫程鄭為具召之并

召令酒酣臨邛令前奏琴曰竊聞長卿好之願以自娛相如辭謝為鼓一再行是時卓王孫有



女文君新寡好音故相如繆與令相重而以琴  
心挑之相如之臨邛從車騎雍容閒雅甚都及  
飲卓氏弄琴文君竊從戶窺之心悅而好之恐  
不得當也既罷相如乃使人重賜文君侍者通  
殷勤文君夜亡奔相如相如乃與馳歸成都藝  
苑卮言曰長卿靡不穠麗工至琴歌淺雅或一  
時匆卒或  
後人傳益

司馬相如

鳳兮鳳兮歸故鄉遨遊四海求其皇時未遇今無所將  
何悟今夕今升斯堂有豔淑女在閨房室爾人遐毒我  
腸何緣交頸爲鴛鴦胡頡頏今共翱翔淑女下玉  
臺有兮字  
鳳兮鳳兮從我棲得托孳尾永爲妃交情通體心和諧  
中夜相從知者誰雙翼俱起翻高飛無感我思使余悲

體玉臺作意  
思一作心



昭君怨

琴操曰昭君齊國王穰女年十七獻之元帝元帝以地遠不之幸積五六年帝每遊

後宮常怨不出後單于遣使朝貢帝宴之盡召後宮昭君盛飾而至帝問欲以一女賜單于能者往昭君乃越席請行時單于使在旁驚恨不及昭君至匈奴單于大悅以為漢與我厚縱酒作樂遣使報漢白璧一雙騾馬十四匹胡地珍寶之物昭君恨帝始不見遇乃作怨思之歌單于死子世達立昭君謂之曰為胡者妻母為秦者更娶世達曰欲作胡禮昭君乃吞藥而死按漢書匈奴傳曰竟寧中呼韓邪來朝漢歸王昭君號寧胡閼氏呼韓邪死子雕陶莫臯立為復株索若鞮單于復妻昭君不言飲藥而死餘詳楚調曲王明君注下題本云怨詩

一作怨曠  
思惟歌

王嬙

秋木萋萋其葉萎黃有鳥處山集于苞桑養育毛羽形  
容生光既得升雲上游曲房離宮絕曠身體摧藏志念



抑沈不得頡頏雖得委食心有徊徨我獨伊何來徃變  
常翩翩之燕遠集西羌高山義義河水泱泱父兮母兮  
道里悠長嗚呼哀哉憂心惻傷

形一作儀來徃變  
常一作改變厥常

同前

一曰昭君辭按昭君怨六朝作者多列楚調  
獨此二首入琴操不詳所謂今仍從郭本

梁王叔英妻劉氏

一生竟何定萬事最難保丹青失舊儀玉匣成秋草想  
妾辭關淚至今猶未燥漢使汝南還殷勤爲人道

同前

陳後主

圖形漢宮裏遙聘單于庭狼山聚雲暗龍沙飛雪輕笳  
吟度隴咽笛轉出關鳴啼妝寒葉下愁眉塞月生只餘



馬上曲猶作別時聲

歸風送遠操

西京雜記曰趙后有寶琴曰鳳皇皆以金玉隱起爲龍鳳螭鸞古賢列女

之象亦善爲歸風送遠之操趙飛燕外傳曰帝於太液池作千人舟號合宮之舟池中起爲羸洲榭高四十尺帝御流波文毅無縫衫后衣南越所貢雲英紫裙碧瓊輕綃廣榭上后歌舞歸風送遠之曲帝以文犀簪擊玉甌令后所愛侍郎馮無方吹笙以倚后歌中流歌酣風大起后順風揚音無方長喻細嫋與相屬后裙髀曰顧我顧我后揚袖曰仙乎仙乎去故而就新寧忘懷乎帝曰無方爲我持后無方捨吹持后履久之風霽后泣曰帝恩我使我仙去不待悵然曼嘯泣數行下帝益愧愛后賜無方千萬入后房聞他日宮姝幸者或襞裙爲綳號曰留仙裙

漢趙飛燕

涼風起今天隕霜懷君子今渺難望感予心今多慨慷



蔡氏五弄

琴歷曰琴曲有蔡氏五弄琴集曰五弄遊春淶水幽居坐愁秋思並宮調蔡邕

所作也琴書曰邕性沈厚雅好琴道嘉平初入青溪訪鬼谷先生所居山有五曲一曲製一弄山之東曲常有仙人遊故作遊春南曲有澗冬夏常淶故作淶水中曲即鬼谷先生舊所居也深遂岑寂故作幽居北曲高巖猿鳥所集感物愁坐故作坐愁西曲灌木吟秋故作秋思三年出示馬融甚異之琴議曰隋煬帝以嵇氏四弄蔡氏五弄通謂之九弄

淶水曲

齊江奧

塘上蒲欲齊汀洲杜將歇春心既易蕩春流豈難越桂楫及晚風菱江映初月芳香若可贈爲君步羅襪

同前

梁吳均

香暖金堤滿湛淡春塘溢已送行臺花復倒高樓日



同前二首

江洪

塵容不忍飾臨池客未歸誰能別淶水全取浣羅衣

客未

歸一作思客歸別王臺

作取全取王臺作無趣

潺湲復皎潔輕鮮自可悅橫使有情禽照影遂孤絕

胡笳十八拍

後漢書曰蔡琰字文姬邕之女也博學有才辯又妙於音律適河東衛仲

道夫亡無子歸寧于家興平中天下喪亂文姬沒於南匈奴在胡中十二年生二子曹操痛邕無嗣乃遣使者以金璧贖之而重嫁陳留董祀後感傷亂離追懷悲憤作詩二章蔡琰別傳曰漢末大亂琰為胡騎所獲在右賢王部伍中春月登胡殿感笳之音作詩言志曰胡笳動兮邊馬鳴孤鴈歸兮聲嚶嚶唐劉商胡笳曲序曰蔡文姬善琴能為離鸞別鶴之操胡虜犯中原為胡人所掠入番為王后王甚重之武帝與邕有舊敕大將軍贖以歸漢胡人思慕文姬乃捲蘆



葉爲吹箏奏哀之音後董生以琴寫胡箏聲爲十八拍今之胡箏弄是也琴集曰大胡箏十八拍小胡箏十九拍並蔡琰作按蔡翼琴曲有大小胡箏十八拍沈遠集世名流家聲小胡箏又有契聲一拍共十九拍謂之祝家聲祝氏不詳何代人李良輔廣陵止息譜序曰契者明會合之至理殷勤之餘也李肇國史補曰唐有董庭蘭善沈聲祝聲蓋大小胡箏云藝苑卮言曰胡箏十八拍輒語似出閨襜而中襍唐調非文姬筆也與木蘭頗類又如殺氣朝朝衝塞門胡風夜夜吹邊月全是唐律

第一拍

漢蔡琰

我生之初尚無爲我生之後漢祚衰天不仁兮降亂離地不仁兮使我逢此時干戈日尋兮道路危民卒流亡今共哀悲煙塵蔽野兮胡虜盛志意乖兮節義虧對殊



俗兮非我宜遭惡辱兮當告誰笳一會兮琴一拍心潰

次兮無人知

潰次一作憤怨

### 第二拍

戎羯逼我兮爲室家將我行兮向天涯雲山萬重兮歸路遐疾風千里兮揚塵沙人多暴猛兮如虺虵控弦被甲兮爲驕奢兩拍張懸兮弦欲絕志摧心折兮自悲嗟

虺一作蟲

### 第三拍

越漢國兮入胡城亾家失身兮不如無生氈裘爲裳兮骨肉震驚羯羶爲味兮枉遏我情鞞鼓喧兮從夜達明



胡風浩浩兮暗塞營傷今感昔今三拍成銜悲畜恨兮

何時平

暗塞營一作  
暗塞昏營

第四拍

無日無夜兮不思我鄉土稟氣含生兮莫過我最苦天  
災國亂兮人無主唯我薄命兮沒我虜俗殊心異兮身  
難處嗜慾不同兮誰可與語尋思涉歷兮多難阻四拍  
成兮益懷楚

多一作何

第五拍

鴈南征兮欲寄邊心鴈北歸兮爲得漢音鴈飛高兮邈  
難尋空腸斷兮思情情攢眉向月兮撫雅琴五拍泠泠



今意彌深

心一作聲

第六拍

冰霜凜凜今身苦寒飢得肉酪今不能食夜聞隴水兮  
聲嗚咽朝見長城兮路杳漫追思往日兮行李難六拍  
悲來兮欲罷彈

第七拍

日暮風悲兮邊聲四起不知愁心兮說向誰是原野蕭  
條兮烽戍萬里俗賤老弱兮少壯爲美逐有水草兮安  
家葺壘牛羊滿野兮聚如蜂蟻草盡水竭兮羊馬皆徙  
七拍流恨兮惡居於此

野一作地



第八拍

爲天有眼兮何不見我獨漂流爲神有靈兮何事處我  
天南海北頭我不負天兮天何配我殊匹我不負神兮  
神何殛我越荒州製茲八拍兮擬俳優何知曲成兮轉  
悲愁

第九拍

天無涯兮地無邊我心愁兮亦復然人生倏忽兮如白  
駒之過隙然不得歡樂兮當我之盛年怨兮欲問天天  
蒼蒼兮上無緣舉頭仰望兮空雲煙九拍懷情兮誰爲

傳

爲一  
作與



第十拍

城頭烽火不曾滅疆場征戰何時歇殺氣朝朝衝塞門  
胡風夜夜吹邊月故鄉隔兮音塵絕哭無聲兮氣將咽  
一生辛苦兮緣離別十拍悲深兮淚代血

第十一拍

我非貪生而惡死不能捐身兮心有以生仍冀得兮歸  
桑梓死當埋骨兮長已矣日居月諸兮在戎壘胡人寵  
我兮有二子鞠之育之兮不羞耻愍之念之兮生長邊  
鄙十有一拍兮因茲起哀響纏綿兮徹心髓仍冀一作  
乃既日居

月諸一作  
日月居諸



第十二拍

東風應律兮暖氣多漢家天子兮布陽和羌胡蹈舞兮  
共謳歌兩國交歡兮罷兵戈忽逢漢使兮稱近詔遣千  
金兮贖妾身喜得生還兮逢聖君嗟別二子兮會無因  
十有二拍兮哀樂均去住兩情兮難具陳

蹈一作踏逢  
一作遇難一

作誰漢家上一  
有知是二字

第十三拍

不謂殘生兮却得旋歸撫抱胡兒兮泣下霑衣漢使迎  
我兮四牡駢駢號失聲兮誰得知與我生死兮逢此時  
愁爲子兮日無光輝焉得羽翼兮將汝歸一步一遠兮



足難移魂消影絕兮恩愛遺十有三拍兮弦急調悲肝  
腸攪刺兮人莫我知

號失聲兮一作胡兒號兮

### 第十四拍

身歸國兮兒莫知隨心懸懸兮長如飢四時萬物兮有  
盛衰唯我愁苦兮不暫移山高地濶兮見汝無期更深  
夜闌兮夢汝來斯夢中執手兮一喜一悲覺後痛吾心  
兮無休歇時十有四拍兮涕淚交垂河水東流兮心是

思

我一作有

### 第十五拍

十五拍兮節調促氣填曾兮誰識曲處穹廬兮偶殊俗



願得歸來兮天從欲再還漢國兮歡心足心有憶兮愁  
轉深日月無私兮曾不照臨子母分離兮意難任同天  
隔越兮如商參生死不相知兮何處尋

願下一無得  
字憶一作懷

第十六拍

十六拍兮思茫茫我與兒兮各一方日東月西兮徒相  
望不得相隨兮空斷腸對萱草兮徒想憂忘彈鳴琴兮  
情何傷今別子兮歸故鄉舊怨平兮新怨長泣血仰頭  
兮訴蒼蒼胡爲生我兮獨罹此殃

一無  
我字

第十七拍

十七拍兮心鼻酸關山阻脩兮行路難去時懷土兮心



無緒來時別兒今思漫漫塞上黃蒿今枝枯葉乾沙場  
白首今刀痕箭瘢風霜慄慄今春夏寒人馬飢飢今筋  
力單豈知重得今入長安歎息欲絕今淚闌干

筋力一作骨肉

### 第十八拍

胡笳本自出胡中緣琴翻出音律同十八拍今曲雖終  
響有餘今思無窮是知絲竹微妙今均造化之功哀樂  
各隨人心今有變則通胡與漢今異域殊風天與地隔  
今子西母東苦我怨氣今浩於長空六合雖廣今受之  
應不容

無一作未

### 胡笳曲

宋吳邁遠



輕命重意氣古來豈但今  
緩頰獻一說揚眉受千金  
邊風落寒草鳴笳墜飛禽  
越情結楚思漢耳聽胡音  
既懷離俗傷復悲朝光侵  
日當故鄉沒遙見浮雲陰

同前

此似  
識詩

梁陶弘景

自負飛天歷與奪徒紛紜  
百年三五代終是甲辰君

自負

郭作負辰一作  
自辰三一作四

同前

二首

江洪

藏器欲逢時年來不相讓  
紅顏征戍兒白首邊城將

逢

邀作

落日慘無光臨河獨飲馬  
颼颼夕風高聯翩飛鴈下



琴思楚歌

漢王逸

盛陰脩夜何難曉思念糾戾腸摧繞時節晚暮年齒老  
冬夏更運去若頽寒來暑往難逐追形容減少顏色虧  
時忽晻晻若鶩馳意中私喜施用爲內無所恃失本義  
志願不得心肝沸憂懷感結重歎噫歲月已盡去奄忽  
亡官失祿去家室思想君命幸復位久處無成卒放弃

於忽操

二章

漢龐德公

於忽乎不可以爲其又奚爲離婁之精夜何有於明師  
曠之耳聾者亦有爾東王良之手今後車載之前行險  
旣以覆今後逐逐其猶來雖目盼而心駭今顧其能之



安施委繩墨以聽人今雖班輸亦奚以爲

於忽乎不可以爲其又奚爲椽櫨榱之累重顧柱小  
之奈何方風雨之晦陰行者艱而莫休居者坐而笑歌  
不知壓之忽然今其謂安何


於忽乎不可以爲其又奚爲謂雞斯飛誰得而羈謂豕  
斯突何取於縛是皆以食而得之吾於飢而後噫雞今  
豕今歿以是今

琴歌

魏文士傳曰太祖雅聞瑀名辟之不應乃逃

入山中大祖使人焚山得瑀太祖時征長安  
大延賓客怒瑀不與語使就技人列瑀善解音  
能鼓琴撫絃而歌爲曲既捷音聲殊妙太祖大  
悅裴松之注曰案魚氏典畧摯虞文章志並云  
瑀建安初辭疾避役不爲曹洪屈得太祖召卽











聞戶外有嗟賞聲見一女子雅有容色謂敬伯  
曰女郎悅君之琴願共撫之敬伯許焉既而女  
郎至姿質婉麗綽有餘態從以二少女一則向  
先至者女郎乃撫琴揮絃調韻哀雅類今之登  
歌曰古所謂楚明君也唯嵇叔夜能爲此聲自  
茲已來傳習數人而已復鼓琴歌遲風之詞因  
歎息久之乃命大婢酌酒小婢彈箏篴作宛轉  
歌女郎脫頭上金釵扣琴弦而和之意韻繁諧  
歌凡入曲敬伯唯憶二曲將去留錦臥具繡香  
囊并佩一雙以遺敬伯敬伯報以牙火籠玉琴  
軫女郎悵然不忍別且曰深閨獨處十有六年  
矣邂逅旅館盡平生之志蓋冥契非人事也言  
竟便去敬伯船至虎牢戍吳令劉惠明者有愛  
女早世舟中亡臥具於敬伯船獲焉敬伯具以  
告果於帳中得火籠琴軫女郎名妙容字雅華  
大婢名春條年二十許小婢名桃枝年十五皆  
善彈箏篴及宛轉歌相繼俱  
卒按此宜入鬼詩姑從郭本

晉劉妙容

月既明西軒琴復清寸心斗酒爭芳夜千秋萬歲同一



情歌宛轉宛轉淒以哀願爲星與漢光影共徘徊

悲且傷參差淚成行低紅掩翠方無色金徽玉軫爲誰  
鏘歌宛轉宛轉情復悲願爲煙與霧氛氲對容姿  
成一作幾

同前

陳江揔

七夕天河白露明八月濤水秋風驚樓中恒聞哀響曲  
塘上復有苦辛行不解何意悲秋氣直置無秋悲自生  
不怨前堦促織鳴偏愁別路搗衣聲別燕差池自有返  
離蟬寂寞詎含情雲聚懷情四望臺月冷相思九重觀  
欲題芍藥詩不成來采芙蓉花已散金樽送曲韓娥起  
玉柱調弦楚妃歎翠眉結恨不復開寶髻迎秋度前亂



湘妃拭淚灑貞筠。簌藥浣衣何處人。步步香飛金薄履。  
盈盈扇掩珊瑚唇。已言采桑期陌上。復能解佩就江濱。  
競入華堂要花枕。爭開羽帳奉華茵。不惜獨眠前下釣。  
欲許便作後來薪。後來暝暝同玉牀。可憐顏色無比方。  
誰能巧笑特窺井。乍取新聲學繞梁。宿處留嬌墮黃珥。  
鏡前含笑弄明璫。卷施摘心心不盡。茱萸折葉葉更芳。

已聞能歌洞簫賦。詎是故愛邯鄲倡。

便一作別  
卷一作採

秋風

玉臺題云古意贈今人鮑令暉作郭本無誰  
爲以下六句自此以下多不詳曲所由起

故但以作者爲次白雪秋竹本爲古曲白雪諸  
說互異秋竹特見諷賦亦不言始自何時且其  
古辭並亡惟齊徐孝嗣謝  
眺擬作而已今從次入

宋吳邁遠



寒鄉無異服。衣氎代文練。日月望君歸。年年不解綰。荆  
揚春早和。幽冀猶霜霰。北寒妾已知。南心君不見。誰爲  
道辛苦。寄情雙飛燕。形迫杼煎絲。顏落風催電。容華一  
朝改。唯餘心不變。衣氎一作氎褐

同前

湯惠休

秋風嫋嫋入曲房。羅帳含月思心傷。蟋蟀夜鳴斷人腸。  
長夜思君心飛揚。他人相思君相忘。錦衾瑤席爲誰芳。

同前

三首

梁江洪

先拂連雲臺。罷入迎風殿。已拆池中荷。復驅簷裏燕。  
北牖風摧樹。南籬寒蟲吟。庭中無限月。思歸夜鳴砧。



嬌婦悲四時況在秋閨內淒葉留晚蟬虛庭吐寒菜

楚朝曲

宋吳邁遠

白雲縈藹荆山阿洞庭縱橫生白波幽芳遠客悲如何  
繡被掩口越人歌壯年流瞻襄成和清貞空情感電過  
初同末異憂愁多窮巷惻愴沉汨羅延思萬里挂長河

翻驚漢陰動湘娥

生白波一作日生波

楚明妃曲

前已有昭君怨不知此亦同否

宋湯惠休

瓊臺彩楹桂寢雕甍金閨流耀玉牖含英香芬幽藹珠  
綵珍榮文羅秋翠紈綺春輕駭駕鸞鶴往來仙靈含姿  
綿視微笑相迎結蘭枝送目成當年爲君榮



# 白雪歌

張華博物志曰白雪者太帝使素女鼓五十弦琴曲名也謝希逸琴論曰劉涓子善

鼓琴制陽春白雪曲琴集曰白雪師曠所作商調曲唐書樂志曰白雪周曲也高宗顯慶二年太常言白雪琴曲本宜合歌今依琴中舊曲以御製雪詩爲白雪歌辭又古今樂府奏正曲之後皆別有送聲乃取侍臣許敬宗等和詩以爲送聲各十六節六年二月呂才造琴歌白雪等曲帝亦著歌辭十六章皆著于樂府以上各說不同按嵇康琴賦揚白雪發清角注止引宋玉不復如前所云孝嗣齊人今但次于宋後按白雪一作楚曲

## 齊徐孝嗣

風闥晚翻靄月殿夜凝明願君早流盼無令春草生

一流

留作

## 同前

## 梁朱孝廉



凝雲沒霄漢從風飛且散聯翩避幽谷徘徊依井幹既  
興楚客謠亦動周王歎所恨輕寒早不追陽春旦

陽春一作

光春

秋竹曲

宋玉諷賦曰臣復援琴鼓之爲秋竹積雪之曲

齊謝朓

娉娟綺牕北結根未參差從風旣裊裊映日頗離離欲  
求棗下吹別有江南枝但能凌白雪貞心蔭曲池

雙燕離

琴集曰獨處吟流嘶咽雙燕離處女吟四曲其詞俱入琴歷曰河間新歌二十一章

此其四曲也藝文作雙燕詩

梁簡文帝

雙燕有雄雌照日兩差池銜花落北戶逐蝶上南枝桂  
棟本曾宿虹梁早自窺願得長如此無令雙燕離



同前

沈君攸

雙燕雙飛雙情相思容色已改故心不衰雙入幙雙出  
帷秋風去春風歸幙上危雙燕離銜羽一別涕泗垂夜  
夜孤飛誰相知左回右顧還相慕翩翩桂水不忍渡懸  
目挂心思越路縈鬱摧折意不泄願作鏡鸞相對絕一作

孤鸞鏡中絕  
又作對鏡絕

湘夫人

劉向列女傳曰堯二女娥皇女英以妻舜  
既為天子死于蒼梧二妃沒江湘之間俗

謂之湘君王逸楚辭注曰二女隨帝不反墮于  
湘水之渚因為湘夫人琴操有湘妃怨又有湘  
夫人曲郭氏樂府以其舜妃遂附于南風操後  
然此曲寔未詳所起今惟依沈約世次且九歌  
有湘夫人亦僅附楚郭至謂娥皇正  
妃為湘君女英宜降為夫人者甚謬



梁沈約

瀟湘風已息。沅澧復安流。揚蛾一含睇。嬈娟好且脩。捐玦置澧浦。解佩寄中洲。

同前

王僧孺

桂棟承薜帷。眇眇川之湄。白蘋徒可望。綠芷竟空滋。日暮思公子。銜意嘿無辭。

綠竹

梁吳均

嬋娟鄣綺殿。繞弱拂春漪。何當逢採拾。爲君笙與篴。

飛龍引

隋蕭慤

河曲銜圖出。江上負舟歸。欲因作雨去。還逐景雲飛。引



商吹細管下徵汎長徽持此淒清引春夜舞羅衣

成連

列子曰伯牙學琴于成連詳水仙操注按此曲言征夫遠役與前說無與

隋辛德源

征夫從遠役歸望絕雲端  
蓑笠城踰壞桑落梅初寒  
雪夜然烽濕冰朝飲馬難  
寂寂長安信誰念客衣單

姪佚曲

沸大作此曲彈琴以兆史見也

隋僧沸大

煌煌鬱金生于野田過時不採  
宛見棄捐曼爾豐熾華色惟新  
與我同歡

古樂苑卷第三十一

終



古樂苑卷第三十二

西吳 梅鼎祚 補正

東越 呂胤昌 校閱

襍曲歌辭

宋書樂志曰古者天子聽政使公卿大夫獻詩者  
艾修之而後王斟酌焉然後被於聲於是有採詩  
之官周室下衰官失其職漢魏之世歌詠襍興而  
詩之流乃有八名曰行曰引曰歌曰謠曰吟曰詠  
曰怨曰歎皆詩人六義之餘也至其協聲律播金  
石而摠謂之曲若夫均奏之餘高下音節之緩急文  
辭之多少則繫乎作者才思之淺深與其風俗之  
薄厚當是時如司馬相如曹植之徒所爲文章深  
厚爾雅猶有古之遺風焉自晉遷江左下逮隋唐  
德澤寢微風化不競去聖逾遠繁音日滋曲興  
於南朝胡音生於北俗哀淫靡曼之辭迭作並起  
流而忘反以至陵夷由是新聲熾而雅音廢矣昔



晉平公說新聲而師曠知公室之將卑李延年善爲新聲變曲而聞者莫不感動其後元帝自度曲被聲歌而漢業遂衰曹妙達等改易新聲而隋文不能救嗚呼新聲之感人如此是以爲世所貴雖公情之作或出一時而聲辭淺迫少復近古故蕭齊之將亾也有伴侶高齊之將亾也有無愁陳之將亾也有玉樹後庭花隋之將亾也有泛龍舟所謂煩手淫聲爭新怨哀此又新聲之弊也襍曲者歷代有之或心志之所存或情思之所感或宴游懽樂之所發或憂愁憤怨之所興或叙離別悲傷之懷或言征戰行役之苦或緣於佛老或出自夷虜兼收備載故摠謂之襍曲自秦漢已來數千百歲文人才士作者非一于戈喪亂亾失旣多聲辭不具故有名存義亾不見所起而有古辭可考者則若傷歌行生別離長相思棗下何纂纂之類是也復有不見古辭而後人斷有擬述可以槩見其義者則若出自薊北門結客少年場秦王卷衣半渡溪空城雀齊謳吳趨會吟悲哉之類是也又如漢阮瑀之駕出北郭門曹植之惟漢苦思欲遊南山事君車已駕桂之樹等行磐石驅車浮萍種葛



吁嗟鰕鰓等篇傳玄之雲中白子高前有一樽酒  
鴻鴈生塞北行昔君飛塵車遙遙篇陸機之置酒  
篇王循之晨風鮑照之鴻鴈如此之類其篇甚多  
或因意命題或學古叙事其辭具在不復備論  
郭氏樂府所列襍曲稍似類從實多錯紊今編但  
依世次代以統人人以統篇別有擬作仍附其後  
西漢  
東漢

### 楚歌

一作鴻鵠歌史記留侯世家曰上欲廢太子  
立戚夫人子趙王如意呂后乃使建成侯呂

澤劫留侯爲畫計留侯曰此難以口舌爭也顧  
上有不能致者天下有四人四人者年老矣皆  
以爲上慢侮人故逃匿山中義不爲漢臣然上  
高此四人今公誠能無愛金玉璧帛令太子爲  
書卑辭安車因使辯士固請宜來來以爲客時  
時從入朝令上見之則必異而問之上知此四  
人賢則一助也於是呂后迎此四人十二年上  
從擊破布軍歸疾益甚愈欲易太子及燕置酒  
太子侍四人從太子年皆八十有餘餘鬚眉皓白  
衣冠甚偉上怪之問曰彼何爲者四人前對各



言名姓曰東園公角里先生綺里季夏黃公上  
乃大驚曰吾求公數歲公辟逃吾今公何自從  
吾兒游乎四人皆曰陛下輕士善罵臣等義不  
受辱故恐而亡匿竊聞太子爲人仁孝恭敬愛  
士天下莫不延頸欲爲太子死者故臣等來耳  
上曰煩公幸卒調護太子四人爲壽已畢趨去  
上目送之召戚夫人指示四人者曰我欲易之  
彼四人輔之羽翼已成難動矣呂后真而主矣  
戚夫人泣上曰爲我楚舞吾爲若楚歌數闋  
戚夫人嗟唏流涕上起去罷酒竟不易太子

漢高帝

鴻鵠高飛一舉千里羽翮已就橫絕四海橫絕四海當

可奈何雖有繒繳尚安所施

翮一作翼當漢書作又尚一作將

春歌

一作永巷歌漢書外戚傳曰高帝得定陶戚姬愛幸生趙隱王如意惠帝立呂后爲皇太

后廼令永巷囚戚夫人髡鉗衣赭衣令春戚夫人春且歌太后聞之大怒曰乃欲倚女子邪召



趙王誅之戚夫人  
遂有人彘之禍

# 漢戚夫人

子爲王母爲虜終日春薄暮常與死爲伍相離三千里  
當誰使告女

## 幽歌

漢書列傳曰趙幽王友高帝諸姬子初封淮陽王呂太后徙爲趙王孝惠時友以諸呂女

爲后不愛愛它姬諸呂女讒之於太后曰呂氏安得王太后百歲後吾必擊之太后怒召趙王置邸令衛圍守之趙王餓乃作歌遂幽死

## 漢趙王友

諸呂用事兮劉氏微迫脅王侯兮彊授我妃我妃既妬  
兮誣我以惡讒女亂國兮上曾不寤我無忠臣兮何故  
棄國自決中野兮蒼天與直于嗟不可悔兮寧早自賊  
爲王餓死兮誰者憐之呂氏絕理兮託天報仇

臣一作良



耕田歌

耕一作種史記齊王世家曰諸呂擅權用事朱虛侯劉章忿劉氏不得職嘗入侍宴

太后令為酒吏章自請曰臣將種也請以軍法行酒太后曰可酒酣章進飲歌舞請為耕田歌頃之諸呂有一人醉亡酒章追拔劍斬之太后大驚業已許其軍法無以罪也

漢朱虛侯章

深耕櫟種立苗欲䟽非其種者鋤而去之

種一作類

瓠子歌

二首漢書武帝紀曰元封二年四月作瓠子歌溝洫志曰帝既封禪乃發卒數萬人

塞瓠子決河還自臨祭湛白馬王璧令羣臣從官皆負薪塞決河時東郡燒草以故薪少乃下淇園之竹以為榿上既臨河決悼其功之不就為作歌詩二章於是卒塞瓠子築宮其上名曰宣防

宣防

漢武帝

瓠子決兮將奈何浩浩洋洋兮慮殫為河殫為河兮地



不得寧功無已時今吾山平吾山平今鉅野溢魚弗鬱

今柏冬日正道弛今離常流蛟龍騁今放遠遊歸舊川

兮神哉沛不封禪今安知外爲我謂河伯今何不仁汎

濫不止今愁吾人齧桑浮今淮泗滿久不返今水維緩

浩浩洋洋一作皓皓昕昕放一作方我謂河伯今何不仁一作皇爲河公今何不仁吾山之吾音魚齧桑縣名

河湯湯今激潺湲北渡回今迅流難寧長菱兮湛美玉

河伯許今薪不屬薪不屬今衛人罪燒蕭條今噫乎何

以禦水隤林竹兮捷石菑宣防塞兮萬福來湛讀曰沈伯一作公

菑側其反

秋風辭

漢武帝故事曰帝行幸河東祠后上顧視帝京所然中流與羣臣飲讌帝歡甚乃自



作秋風辭

漢武帝

秋風起兮白雲飛。草木黃落兮雁南歸。蘭有秀兮菊有芳。懷佳人兮不能忘。汎樓船兮濟汾河。橫中流兮揚素波。簫鼓鳴兮發權歌。歡樂極兮哀情多。少壯幾時兮奈老何。

李夫人歌

漢書外戚傳曰夫人早卒帝思念不已方士齊人少翁言能致其神迺夜張燈

燭設帷帳陳酒肉而令帝居帷帳遙望見好女如李夫人之貌還幄坐而步又不得就視帝愈益相思悲感為作詩令樂府諸音家絃歌之

漢武帝

是邪非邪立而望之偏何姍姍其來遲

偏一作翮

落葉哀蟬曲

王季年拾遺記曰漢武帝思懷李夫人時始穿昆靈之池汎翔禽之舟帝



自造歌曲使女伶歌之時日已西傾涼風激水  
女伶歌聲甚適因賦落葉哀蟬之曲藝苑卮言

云落葉哀蟬

疑是贗作

### 漢武帝

羅袂兮無聲玉墀兮塵生虛房冷而寂寞落葉依於重  
肩望彼美之女兮安得感余心之未寧

### 悲愁歌

漢書西域傳曰武帝元封中遣江都王建  
女細君爲公主以妻烏孫王昆莫公主至  
其國自治宮室居歲時一再與昆莫會置酒  
飲食昆莫年老言語不通公主悲乃自作歌

### 漢烏孫公主

吾家嫁我今天一方遠託異國兮烏孫王穹廬爲室兮  
氊爲牆以肉爲食兮酪爲漿居常土思兮心內傷願爲  
黃鵠兮歸故鄉



黃鵠歌

西京雜記曰始元元年黃鵠下太液池帝為此歌

漢昭帝

黃鵠飛兮下建章羽肅肅兮行蒼蒼金爲衣兮菊爲裳

唼喋荷荇出入蕪葭自顧非薄愧爾嘉祥

菲薄一作薄德

淋池歌

拾遺記曰昭帝始元元年穿淋池廣千步東引太液之水池中植分芰荷一莖四葉

狀如駢蓋花葉離萎芬馥之氣徹十餘里宮人餐之每遊宴出入必皆含嚼或剪以爲衣或折以蔽日以爲戲弄帝時命水嬉以文梓爲船木蘭爲柂刻飛鸞翔鵠飾於船首隨風輕漾畢景忘歸乃至通夜

使宮人歌曰

漢昭帝

秋素景兮汎洪波揮纖手兮折芰荷涼風淒淒揚棹歌

雲光開曙月低河萬歲爲樂豈云多

亦見三輔黃圖

燕王歌

漢書列傳曰昭帝時旦爲燕王自以爲武帝子且長不得立乃與旦姊蓋長公主左



將軍上官桀交通謀廢帝迎立舍人父燕倉知其謀告之由是發覺王憂懣置酒萬載宮會賓客羣臣妃妾坐飲王自歌華容夫人起舞坐者皆泣天子使使者賜璽書王以綬自絞後夫人隨旦自殺者二十餘人

### 漢燕王旦

歸空城兮狗不吠雞不鳴橫術何廣廣兮固知國中之無人

### 華容夫人歌

髮紛紛兮寘渠骨籍籍兮亡居母求死子今妻求死夫

喪回兩渠間兮君子獨安居

獨一作將

### 瑟歌

漢書外傳曰廣陵厲王胥武帝第五子昭帝時胥見帝年少無子有覬欲心迎女巫李女

須使下神呪詛宣帝即位呪詛事發覺天子遣廷尉大鴻臚即訊胥置酒顯陽殿召太子霸及



子女等夜飲使所幸鼓瑟歌舞王自歌左  
右悉涕泣奏酒至雞鳴時罷以綬自絞歿

漢廣陵王胥

欲久生兮無終長不樂兮安窮奉天期兮不得須臾千  
里馬兮駐待路黃泉下兮幽深人生要歿何爲苦心何  
用爲樂心所喜出入無悰爲樂亟蒿里召兮郭門閼歿  
不得取代庸身自逝

閼一作閼

歌二首

漢書列傳曰廣川王去以陽城昭信爲后幸姬陶望卿爲脩靡夫人主繒帛崔脩成

爲明貞夫人主永巷後昭信譖望卿失寵去與昭信等飲諸婢皆侍去爲望卿作歌曰背尊章使美人相和歌之竟殺望卿昭信欲擅愛曰王使明貞夫人主諸姬淫亂難禁乃盡閉諸姬舍門上籥於后非大置酒召不得見去憐之爲作歌曰愁莫愁令昭信聲鼓爲節以教諸姬歌之



歌罷輒歸  
永巷封門

漢廣川王去

背尊章嫖以忽謀屈奇起自絕行周流自生惠諒非望

今誰怨

望卿歌

愁莫愁生無聊心重結意不舒內第鬱憂哀積上不見  
天生何益日崔隤時不再願弃軀歟無悔

脩成歌

據地歌

東方朔為郎常侍中人皆以為狂朔曰如朔所謂避世於朝廷間者也古之人乃避

世於深山中時坐席  
中酒酣據地歌曰

漢東方朔

陸沉於俗避世金馬門宮殿中可以避世全身何必深  
山之中蒿蘆之下

延年歌

漢書李延年性知音善歌舞武帝愛之侍  
上起舞歌曰上歎息曰世豈有此人乎平



陽主因言延年有女弟上召見之實妙麗善舞由是得幸漢李延年

北方有佳人絕世而獨立一顧傾人城再顧傾人國寧不知傾城與傾國佳人難再得

別歌

漢書列傳曰昭帝即位數年匈奴與漢和親漢使求蘇武等單于許武還李陵置酒賀武

曰異域之人一別長絕因起舞而歌泣下數行遂與武決漢李陵

徑萬里兮度沙漠爲君將兮奮匈奴路窮絕兮矢刃摧士衆滅兮名已噴老母已死雖欲報恩將安歸

拊缶歌

漢書宣帝時霍氏謀反惲先以聞封平通侯與太僕戴長樂相失長樂告惲罪免爲庶人惲家居治產業起室宅友人安定太守西

河孫會宗與惲書諫戒之惲宰相子語言見察內懷不服乃答會宗書云田家作苦歲時伏臘烹羊包羔斗酒自勞家本秦也能爲秦聲婦趙



女也雅善鼓瑟奴婢歌者數人酒後  
耳熱仰天拊缶而呼烏烏其詩曰

漢楊惲

田彼南山蕪穢不治種一頃豆落而爲其人生行樂耳

須富貴何時

東漢

招商歌

拾遺記曰靈帝初平三年遊於西園起裸  
遊館于間采綠苔而被堦引渠水以繞砌

周流澄徹乘船遊漾選玉色宮人執  
篙楫又奏招商之曲以來涼風歌曰

漢靈帝

涼風起今日照渠青荷晝偃葉夜舒惟日不足樂有餘

清絲流管歌玉鳧千年萬歲嘉難踰

拾遺記渠中植蓮  
大如蓋長一丈南

國所獻其葉夜舒晝卷  
名夜舒荷玉鳧曲名



弘農王歌

袁山松後漢書曰董卓廢少帝為弘農王立陳留王為帝置弘農王于閣上初

平元年春正月使郎中令李儒進鵠曰服此辟惡王曰此必是毒也弗肯強之於是王與唐姬及宮人共飲酒王自歌曰云云唐姬起舞歌曰云云因泣下坐者噓歛不自勝王謂唐姬曰卿故王者妃勢不復為吏民妻也行矣自愛從此長辭遂飲鵠死時年十八

漢弘農王辯

天道易兮我何艱棄萬乘兮退守藩逆臣見迫兮命不

延逝將棄兒兮適幽玄

守藩一作宮  
藩兒一作汝

唐姬歌

皇天崩兮后土頽身為帝王兮命天摧公生路異兮從

此乖悼我煢獨兮中心哀

悼一作奈中心  
哀一作心中哀



五噫歌

後漢書曰梁鴻東出關過京小師作五噫之歌肅宗聞而惡之求鴻不得曰一云登北邙

止作五  
意之歌

漢梁鴻

陟彼北芒兮噫顧瞻帝京兮噫宮闕崔嵬兮噫民之劬

勞兮噫遠遼未央兮噫

芒一作邙  
瞻一作覽

武溪深行

一曰武陵深行崔豹古今注曰武溪深馬援南征之所作也援門生爰寄生善

吹笛援作歌令寄生吹  
笛以和之名曰武溪深

漢馬援

滔滔武溪一何深鳥飛不度獸不能臨嗟哉武溪兮多

毒淫

能一作敢  
一無兮字

同前

梁劉孝勝

武溪深不測水安舟復輕暫侶莊生釣還滯鄂君行櫂



歌爭後發譟鼓逐前征秦上山川險黔中木石并林壑  
秋籟急猿哀夜月鳴澄源本千仞回峰忽萬縈昭潭讓  
無底太華推削成日落野通氣目極悵餘情下流曾不  
濁長邁寂無聲羞學滄浪水濯足復濯纓木石并一作水石清濯纓

一作沾纓

### 祚都夷歌

祚都夷者武帝所開以為祚都縣後漢書西南夷傳曰明帝時益州刺史朱輔

宣示漢德威懷遠夷自汶山以西前世所不至正朔所未加白狼槃木等百餘國皆舉種稱臣奉貢白狼王唐菆作詩三章歌頌漢德輔使譯而獻之丹鉛閨錄曰白狼王歌詩音韻與漢無異可疑也藝苑卮言曰夷語有長短何以皆四言蓋益都太守代為之也

### 白狼王唐菆



遠夷樂德歌

大漢是治與天合意吏譯平端不從我來聞風向化所  
見奇異多賜繒布甘美酒食昌樂肉飛屈伸悉備蠻夷  
貧薄無所報嗣願主長壽子孫昌熾

遠夷慕德歌

蠻夷所處日入之部慕義向化歸日出主聖德深恩與  
人富厚冬多霜雪夏多和雨寒溫時適部人多有涉危  
歷險不遠萬里去俗歸德心歸慈母

遠夷懷德歌

荒服之外土地境埒食肉衣皮不見鹽穀吏譯傳風大



漢安樂攜負歸仁觸冒險狹高山岐峻緣崖磻石木薄  
發家百宿到洛父子同賜懷抱匹帛傳告種人長願臣  
僕

射鳥辭

漢明帝起居注曰上東巡泰山到滎陽有  
鳥飛鳴乘輿上虎賁郎王吉射之中而祝  
曰云云帝大悅賜錢二百萬令  
亭壁悉畫鳥焉亦載風俗通

漢王吉

鳥鳥啞啞引弓射洞左腋陛下壽萬年臣爲二千石

爲一

作至

冉冉孤生竹

又心雕龍云孤竹  
一篇傳毅之辭

漢傳毅

冉冉孤生竹結根泰山阿與君爲新婚菟絲附女蘿菟



絲生有時夫婦會有宜千里遠結婚悠悠隔山陂思君  
令人老軒車來何遲傷彼蕙蘭花含英揚光輝過時而  
不采將隨秋草萎亮君執高節賤妾亦何爲

同前

拾遺作  
擬古

宋何偃

流萍依清源孤鳥親宿止蔭幹相經縈風波能終始草  
生有日月婚年行及紀思欲侍衣裳關山分萬里徒作  
春夏期空望良人軌芳色宿昔事誰見過時美涼鳥臨  
秋竟歡願亦云已豈意倚君恩坐守零落耳

臨一作散

怨篇

漢張衡

序曰秋蘭嘉味人也嘉而不獲用故作是詩也



猗猗秋蘭植彼中阿有馥其芳有黃其葩雖曰幽深厥

美彌嘉之子之遠我勞如何

之遠一作云遠

歌

見太平御覽文心雕龍曰張衡怨篇清曲可味仙詩緩歌雅有新聲此或仙詩緩歌之遺句耶

漢張衡

浩浩陽春發楊柳何依依百鳥自南歸翱翔萃我枝

萃一作

集作

同聲歌

樂府解題曰同聲歌漢張衡所作也言婦人自謂幸得充閨房願勉供婦職不離君

子思為莞簞在下以蔽匡牀衾稠在上以護霜露繾綣枕席沒齒不忘焉以喻臣子之事君也晉傳玄何當行曰同聲自相應同心自相知言結交相合其義亦同

漢張衡



邂逅承際會。得充君後房。情好新交接。恐慄若探湯。不  
才勉自竭。賤妾職所當。綢繆主中饋。奉禮助蒸嘗。思爲  
莞蒹席。在下蔽匡牀。願爲羅衾幘。在上衛風霜。灑掃清  
枕席。鞞芬以狄香。重戶結金扃。高下華燈光。衣解巾粉  
御。列圖陳枕張。素女爲我師。儀態盈萬方。衆夫所希見。  
天老教軒皇。樂莫斯夜樂。沒齒焉可忘。  
狄一作秋  
夫一作太  
思爲莞蒹席一  
作願思爲莞席

### 何當行

晉傅玄

同聲自相應。同心自相知。外合不由中。雖固終必離。管  
鮑不世出。結交安可爲。



定情歌

漢張衡

大火流兮草蟲鳴○繁霜降兮草木零○秋爲期兮時已征○思美人兮愁屏營○

定情詩

樂府解題曰定情詩漢繁欽所作也言婦人不能以禮從人而自相悅媚乃解

衣服玩好致之以結綢繆之志若臂環致拳拳指環致慇懃耳珠致區區香囊致扣扣跳脫致契濶佩玉結恩情自以爲志而期於山隅山陽山西山北終而不答乃自傷悔焉

魏繁欽

我出東門遊邂逅承清塵○思君卽幽房○侍寢執衣巾○時無桑中契○迫此路側人○我旣媚君姿○君亦悅我顏○何以致拳拳○綰臂雙金環○何以致慇懃○約指一雙銀○何以致



區區耳中雙明珠。何以致叩叩。香囊繫肘後。何以致契  
濶。繞腕雙跳脫。何以致結。恩情珮玉綴羅纓。何以致結。中心  
素縷連雙針。何以致結。相於金薄畫搔頭。何以致慰。別離耳  
後瑤琨釵。何以致答。歡悅紈素三條裾。何以致結。愁悲白絹  
雙中衣。與我期何所。乃期東山隅。日旰今不至。谷風吹  
我襦。遠望無所見。涕泣起踟躕。與我期何所。乃期山南  
陽。日中今不來。飄風吹我裳。逍遙莫誰覩。望君愁我腸。  
與我期何所。乃期西山側。日夕今不來。踟躕長歎息。遠  
望涼風至。俯仰正衣服。與我期何所。乃期山北岑。日暮  
今不來。淒風吹我衿。望君不能坐。悲苦愁我心。愛身以



何為惜我華色時中情既欸欸然後尅密期褰衣躡茂  
草謂君不我欺廁此醜陋質徙倚無所之自傷失所欲  
淚下如連絲於一作投

九曲歌

漢李尤

年歲晚暮時已斜安得力士翻日車

闕

同前

晉傅玄

歲暮景邁羣光絕安得長繩繫白日

闕景太平御覽作時白日作日月

羽林郎

漢書曰武帝大初元年初置建章營騎後更名羽林騎屬光祿勳又取從軍死事之

子孫養羽林官教以五兵號羽林孤兒後漢書百官志曰羽林郎掌宿衛侍從常選漢陽隴西安定北地上郡西河六郡良家補之又有胡姬年十五亦出於此按以當壚雖出司馬相如傳然



以入曲實始此  
辭今亦附後

漢辛延年

昔有霍家奴姓馮名子都依倚將軍勢調笑酒家胡胡  
姬年十五春日獨當壚長裾連理帶廣袖合歡襦頭上  
藍田玉耳後大秦珠兩鬟何窈窕一世良所無一鬟五  
百萬兩鬟千萬餘不意金吾子娉婷過我廬銀鞍何煜  
爚翠蓋空踟躕就我求清酒絲繩提玉壺就我求珍肴  
金盤鱠鯉魚貽我青銅鏡結我紅羅裾不惜紅羅裂何  
論輕賤軀男兒愛後婦女子重前夫人生有新故貴賤  
不相踰多謝金吾子私愛徒區區

霍家奴郭本作趙家妹鬟一作環

胡姬年十五

詩不似晉五言律祖作梁劉琨

晉劉琨



虹梁照曉日。淥水汎香蓮。如何十五少。含笑酒壚前。花  
將面自許。人共影相憐。回頭堪百萬。價重爲時年。

當壚曲

漢書曰司馬相如與卓文君俱之臨邛  
盡賣車騎買酒舍乃令文君當壚相如

身自著犢鼻褌與庸保裸作滌器於市中郭  
璞曰盧酒甕也顏師古曰賣酒之處累土爲  
盧以居酒甕四邊隆起其一而高  
形如鍛盧故名盧當壚曲蓋取此

題云賦  
得當壚

梁簡文帝

十五正團團。流光滿上蘭。當壚設夜酒。宿客解金鞍。迎

來挾琴易。送別唱歌難。欲知心恨急。翻令衣帶寬。

琴一作瑟

同前

一作挾  
琴歌

沈滿願

逶迤飛塵唱。宛轉遶梁聲。調弦可以進蛾眉。畫未成。



同前

載詩話補遺按首二句卽之敬烏棲曲末二句

陳岑之敬

明月二八照花新。當壚十五晚留賓。回眸百萬橫自陳。

挾琴歌

北齊魏收

春風宛轉入曲房。兼送小苑百花香。白馬金鞍去未返。紅粧玉筍下成行。

董嬌嬈

漢宋子侯

洛陽城東路桃李。生路傍。花花自相對。葉葉自相當。春風東北起。花葉正低昂。不知誰家子。提籠行採桑。纖手折其枝。花落何飄颻。請謝彼妹子。何爲見損傷。高秋八月。月白露變爲霜。終年會飄墮。安得久馨香。秋時自零。



樂府 卷三十三  
落春月復芬芳何時盛年去懽愛永相忘吾欲竟此曲

此曲愁人腸歸來酌美酒挾瑟上高堂

愛一作好

古怨歌

竇玄狀貌絕異天子使出其妻妻以公主妻悲怨寄書及歌與玄時人憐而傳之亦

名豔歌按玄妻與玄書有云衣不厭新人不厭故

竇玄妻

玼玼白兔東走西顧衣不如新人不如故

焦仲卿妻作

一云古詩爲焦仲卿妻作

序曰漢末建安中廬江府小吏焦仲卿妻劉氏爲仲卿母所遣自誓不嫁其家逼之乃沒水而死仲卿聞之亦自縊於庭樹時人傷之爲詩云爾

孔雀東南飛五里一徘徊十三能織素十四學裁衣十

五彈箏篴十六誦詩書十七爲君婦心中常苦悲君旣



爲府吏守節情不移賤妾留空房相見常日稀雞鳴入  
機織夜夜不得息三日斷五疋大人故嫌遲非爲織作  
遲君家婦難爲妾不堪驅使徒留無所施便可白公姥  
及時相遣歸府吏得聞之堂上啓阿母兒已薄祿相幸  
復得此婦結髮同枕席黃泉共爲友共事三二年始爾  
未爲久女行無偏斜何意致不厚阿母謂府吏何乃太  
區區此婦無禮節舉動自專由吾意久懷忿汝豈得自  
由東家有賢女自名秦羅敷可憐體無比阿母爲汝求  
便可速遣之遣去慎莫留府吏長跪告伏惟啓阿母今  
若遣此婦終老不復取阿母得聞之槌牀便大怒小子



無所畏何敢助婦語吾已失恩義會不相從許府吏默  
無聲再拜還入戶舉言謂新婦哽咽不能語我自不驅  
卿逼迫有阿母卿但暫還家吾今且報府不久當歸還  
還必相迎取以此下心意慎勿違吾語新婦謂府吏勿  
復重紛紜往昔初陽歲謝家來賢門奉事循公姥進止  
敢自專晝夜勤作息伶俜勞苦辛謂言無辜過供養卒  
大恩仍更被驅遣何言復來還妾有繡腰襦葳蕤自生  
光紅羅複斗帳四角垂香囊箱簾六七十綠碧青絲繩  
物物各自異種種在其中人賤物亦鄙不足迎後人留  
待作邊施於今無會因時時爲安慰久久莫相忘雞鳴



外欲曙新婦起嚴粧著我繡袂裙事事四五通足下躡  
絲履頭上玳瑁光腰若流紈素耳著明月璫指如削葱  
根口如含珠丹纖纖作細步精妙世無雙上堂拜阿母  
阿母怒不止昔作女兒時生小出野里本自無教訓兼  
愧賢家子受母錢帛多不堪母驅使今日還家去念母  
勞家裏却與小姑別淚落連珠子新婦初來時小姑始  
扶牀今日被驅遣小姑如我長勤心養公姥好自相扶  
將初七及下九嬉戲莫相忘出門登車去涕落百餘行  
府吏馬在前新婦車在後隱隱何甸甸俱會大道口下  
馬入車中低頭共耳語誓不相隔卿且暫還家去吾今



且赴府不久當還歸誓天不相負新婦謂府吏感君區  
區懷君既若見錄不久望君來君當作盤石妾當作蒲  
葦蒲葦紉如絲盤石無轉移我有親父兄性行暴如雷  
恐不任我意逆以前煎我懷舉手長勞勞二情同依依入  
門上家堂進退無顏儀阿母大拊掌不圖子自歸十三  
教汝織十四能裁衣十五彈箏篴十六知禮儀十七遣  
汝嫁謂言無誓違汝今何罪過不迎而自歸蘭芝慙阿  
母兒實無罪過阿母大悲摧還家十餘日縣令遣媒來  
云有第三郎窈窕世無雙年始十八九便言多令才阿  
母謂阿女汝可去應之阿女含淚答蘭芝初還時府吏



見丁寧結誓不別離今日違情義恐此事非奇自可斷  
來信徐徐更謂之阿母白媒人貧賤有此女始適還家  
門不堪吏人婦豈合令郎君幸可廣問訊不得便相許  
媒人去數日尋遣丞請還說有蘭家女承籍有宦官云  
有第五郎嬌逸未有婚遣丞爲媒人主簿通語言直說  
太守家有此令郎君旣欲結大義故遣來覲門阿母謝  
媒人女子先有誓老姥豈敢言阿兄得聞之悵然心中  
煩舉言謂阿妹作計何不量先嫁得府吏後嫁得郎君  
否泰如天地足以榮汝身不嫁義郎體其住欲何云蘭  
芝仰頭答理實如兄言謝家事夫壻中道還兄門處分



適兄意那得自任專雖與府吏要渠會永無緣登卽相  
許和便可作婚媾媒人下牀去諾諾復爾爾還部白府  
君下官奉使命言談大有緣府君得聞之心中大歡喜  
視曆復開書便利此月內六合正相應良吉三十日今  
已二十七卿可去成婚交語速裝束絡繹如浮雲青雀  
白鵠舫四角龍子幡婀娜隨風轉金車玉作輪躑躅青  
驄馬流蘇金縷鞍齎錢三百萬皆用青絲穿襪綵三百  
疋交廣市鮭珍從人四五百鬱鬱登郡門阿母謂阿女  
適得府君書明日來迎汝何不作衣裳莫令事不舉阿  
女默無聲手中掩口啼淚落便如瀉移我琉璃榻出置



前牕下左手持刀尺右手執綾羅朝成繡袂裙晚成單  
羅衫晻晻日欲暝愁思出門啼府吏聞此變因求假暫  
歸未至二三里摧藏馬悲哀新婦識馬聲躡履相逢迎  
悵然遙相望知是故人來舉手拍馬鞍嗟歎使心傷自  
君別我後人事不可量果不如先願又非君所詳我有  
親父母逼迫兼弟兄以我應他人君還何所望府吏謂  
新婦賀卿得高遷盤石方且厚可以卒千年蒲葦一時  
紉便作旦夕間卿當日勝賢吾獨向黃泉新婦謂府吏  
何意出此言同是被逼迫君爾妾亦然黃泉下相見勿  
違今日言執手分道去各各還家門生人作死別恨恨



那可論念與世間辭千萬不復全府吏還家去上堂拜  
阿母今日大風寒寒風摧樹木嚴霜結庭蘭兒今日冥  
冥令母在後單故作不良計勿復怨鬼神命如南山石  
四體康且直阿母得聞之零淚應聲落汝是大家子仕  
宦於臺閣慎勿爲婦死賢賤情何薄東家有賢女窈窕  
豔城郭阿母爲汝求便復在旦夕府吏再拜還長歎空  
房中作計乃爾立轉頭向戶裏漸見愁煎迫其日牛馬  
嘶新婦入青廬菴菴黃昏後寂寂人定初我命絕今日  
魂去尸長留攬裙脫絲履舉身赴清池府吏聞此事心  
知長別離徘徊顧樹下自掛東南枝兩家求合葬合葬



華山傍東西植松柏左右種梧桐枝枝相覆蓋葉葉相  
交通中有雙飛鳥自名爲鴛鴦仰頭相向鳴夜夜達五  
更行人駐足聽寡婦起傍徨多謝後世人戒之慎勿忘

前拜阿母一作謝阿  
母交廣一作交用



古樂苑卷第三十二

終



